

Kanser di Pulmon ta Kura Humamentu

Poko siman pasá, Minister di Salú Pùbliko, Stanley Inderson, a hasi uso di dia mundial di salú pa anunsiá su intenshon pa riba tèrmino korto, ofresé un konsepto di lei na Staten kamina ta dekrétá un prohibishon di huma den espasionan pùbliko.

"Hiep hiep hoera!" Esaki sigur ta un paso den un bon direkshon pa nos islanan karibense deshasí di e bisio ku, segun historiadónan, indjannan di Karibe a introdusí na mundu dor di Cristobal Colon 500 aña pasá.

Minister Inderson tin motibunanan válido pa inisiá e pólisa aki.

Sientífikonan a proba ku esun ku ta huma ta dañá su salú. E huma ta kontené mas ku 3.000 diferente kímiko. Hopi di nan ta venenoso òf ta kousa kanser. E humadó tin dies bes mas chèns pa haña kanser di pulmon ku esun ku no ta mishi ku sigaria. Kanser di esófago, garganta, boka, pankreas, i blas di urina tambe por ta kousá pa humamentu. E bisio aki tambe por ta responsabel pa enfermedat di higra i stoma. Hende ku ta huma sa haña ataka di kurason ku dos bes mas frekuensia.

E pakinan i propaganda di Marlboro, Richmond i Nevada por ta atraktivo i parse inosente. Ma kada sigaria ta manera un klabu mas na bo kaha di morto. E humadó averahe lo muri tres te kuater aña promé ku esun ku no ta mishi ku tabaku. I un pèrsona ku ta huma dos òf mas paki di sigaria pa dia por pèrdè asta ocho aña di su bida.

Dios a duna un mandamentu pa "stima bo próhimo méskos ku bo mes" (Mateo 22:39). Hende ku ta huma ta desplegá egoismo i asta odio pa nan próhimo; prinsipalmente pa esunan kerí.

Un muhé na estado ku ta huma ta pèrhudiká e kriatura. E uso di tabaku por kousa "miskraam," nasementu promé ku tempu, i frekuentemente e beibi ta falta e peso ku e mester tin na tempu di parto.

Den último añanan, sientífikonan tambe a proba ku faktonan i estadístika ku humamentu ta kontradsí Hesus Su mandamentu, "Stima bo próhimo méskos ku bo mes". Ta un echo ku bo humamentu ta dañá salú di bo próhimo, esun ku mester respirá e huma di bo sigaria. Na aña 1993, un rapòrt a indiká ku na Merka 3.000 pèrsona ta muri kada aña di kanser di pulmon, no pasobra nan mes ta huma, ma komo resultado di *huma di sigaria di otro hende*.

Ademas, yunan ta sigui ehèmpel di nan mayornan ku ta huma. Ta konosí ku si tata òf mama ta huma, e yunan tin dos bes mas chèns pa huma. Un gran mayoria (75%) di hóbennan ku ta huma tin mayor ku tambe tin e bisio aki. Mayornan mester tene bon kuenta ku esaki pasobra un hóben su uso di tabaku ta habri porta pa uso di otro droga. Un estudio a haña ku 80% di e hóbennan ku ta huma tabaku lo purba huma marihuana tambe, miéntras solamente 21% di e hóbennan ku no ta huma lo purba e droga aki.

Mayornan ku ta prohibí nan yunan di usa droga, miéntras nan mes ta usa (i talbes ta adikto di) e droga nikotina, mester realisá ku nan ta hipókrita. Si bo no ke pa bo yu usa droga, stòp di usa bo droga; stòp di huma.

Apesar di tur e faktonan, sin duda algun hende no ke stòp di huma. Nan ta gusta e bisio aki. Beibel ta rekonosé ku hende tin e libertat pa skohe pa hasi loke nan ke, ora e ta ripití dos bes: "tur kos ta pèrmití na mi" (1 Korintionan 6:12). Ma e mésun teksto tambe ta bisa, "ma tur kos no ta kumbiní...lo mi no laga ningun tuma bentaha riba mi." Bo por ta liber ta hasi loke bo ke. Ma esei no ta kambia e echu ku loke bo ta hasi "no ta kumbiní." Bo ta dañá salú di bo mes i di bo próhimo. Tambe e bisio ta "tuma bentaha riba" bo. Den otro palabra, abo ta bira adikto di nikotina. Bo ta liber pa skohe pa sigui huma; pero e libertat ei rápidamentu por bira sklabbitut.

Si bo no ta huma, no kuminsá! Si bo ta huma, stòp! Si bo ta katibu di e bisio teribel aki, buska yudansa. Si bo no ta tuma e pasonan aki awor, lo bo por bin ripará muchu lat ku tantu pa bo komo bo próhimo ku kanser di pulmon si ta kura humamentu.